




«ՀԱՅՄԻԱԾԻՆ» ԱՄՍԱԳԻՐԸ ԵՎ ԻՐ ԸՆԹԵՐՑՈՂՆԵՐԸ

(Նամակների տեսություն)

Խմբագրությունս բազմաթիվ շնորհավորական նամակներ ստացել և ստանում է և՛ Մայր Հայրենիքի և՛ Սփյուռքի իր հավատացյալ ընթերցողներից, որոնցում նրանք գրում են այն մասին, որ Մայր Աթոռի պաշտոնաթերթ «Էջմիածին» ամսագիրը նրանց համար դարձել է հոգևոր սնունդ մատակարարող մի անհրաժեշտություն, որ նրանք անհամբեր սպասում են ամսագրի ամեն մի նոր համարին, և հաճախ թանկազին թելադրություններ և դիտողություններ են անում ամսագրի բովանդակության և ձևի մասին, և խնդրում են մանավանդ, որ ամսագրի «Մայր Աթոռում» բաժնում ավելի լայն արձագանք գտնի Մայր Աթոռի, Նորին Ս. Օծույթյան, միաբանության, Ճեմարանի կյանքի և գործունեության հետ կապված ամեն մի մանրամասնություն:

Խմբագրությունս միշտ ընդառաջել է և կընդառաջի իր ընթերցողների այդ սրտագին բաղձանքին:

Հայաստանյայց Առաքելական Եկեղեցու վերականգնման աշխատանքներում մեծ ու պատասխանատու դեր է վիճակված մեր այժմյան կրոնական մամուլին — «Էջմիածին», «Միոն», «Հասկ», «Շողակաթ», «Հա-

յաստանյայց Եկեղեցի», «Հայ կեդրոն» պաշտոնաթերթերին:

«Էջմիածին» ամսագիրը, որպես Ամենայն Հայոց Հայրապետության պաշտոնաթերթ և Վեհափառ Հայրապետի կենդանի խոսքը՝ ուղղված իր սիրելի հոտին, սրբությամբ և պատվով է կատարում իր հոգևոր դերը հայ եկեղեցական կյանքում, և որի էջերից միշտ հնչել են քրիստոնեական վեհ իդեալների, համամարդկային վեհ գաղափարների, հայրենի սրբությունների, եկեղեցասիրության և հայրենասիրության սրբազան պատգամները:

«Էջմիածին» ամսագիրը նաև իր պատմական, հայագիտական և բանասիրական արժեքավոր հոդվածների բովանդակությամբ առաջին տեղերից մեկն է գրավում մեր կրոնական մամուլի շարքերում, արժանանալով իր հավատացյալ բազմաթիվ ընթերցողների բարձր գնահատության և քաջալերանքին:

Ստորև ուրախությամբ ենք հրատարակում ստացված բազմաթիվ նամակներից մեկը:

Հարգարժան խմբագրություն

«Էջմիածին» ամսագրի

Հոգեկան մեծ հաճույքով եմ կարդում «Էջմիածին» ամսագրի ամեն մի հա-

մարը: Առանց հուզմունքի և հաճախ արտասուքի չեմ կարող ընթերցել հետաքրքրական, բովանդակալից նյութերը: «Էջմիածին»-ը ինձ համար կենսատու հաց է, առանց որի իմ կյանքը ամբողջական չի լինի: Ես հավատացած եմ, որ ամեն մի ընթերցող ամսագրում կգտնի համապատասխան նյութ ըստ իր ճաշակի և կմխիթարվի գրանով: Ամենից շատ ես հետաքրքրվում եմ «Մայր Աթոռում» բաժնով: Ինձ համար սիրելի է Մայր Աթոռի կյանքից ամեն մի մանրամասնություն: Ամսագրին այնպիսի բնույթ է տրված, որ ամեն մի հայ ուշի ուշով կարդա այն: Ամսագիրը մի տեսակ սրտագին, հոգեկան կապ է Ս. Էջմիածնի և հավատացյալների միջև: Անգնահատելի է մանավանդ ամսագրի կատարած բարոյակամ և դաստիարակչական դերը հայ կյանքում, աշխարհիս ողջ հայերի համար: Ամեն մի ընտանեկան սեղանի

ղարզն է մեր հոգու կենդանի խոսք «Էջմիածին» ամսագիրը: Հաճախ նույնիսկ ժամանակից հետո ձեռք եմ առնում ամսագրի հին համարները՝ նորից կարդալու համար:

«Էջմիածին» ամսագրի ընթերցողները իրենց սրտի խորքում փայփայում ու ջերմ սիրում են այն: Մեղանում շատ ռուսախոս հայեր կան, նրանց համար ըստ կարելիության թարգմանում եմ ամսագրի կարևոր նյութերը, մանավանդ «Մայր Աթոռում» բաժինը, և նրանք արտասովալից աչքերով լսում են ամեն ինչ:

Մեծ սիրով ենք կարդում մեր կաթողիկոսների մասին գրված հիշողություններ: Յանկայի կլինի հաճախ կարդալ նման հոդվածներ:

Ամբողջ սրտով ցանկանում եմ Ձեզ բեղմնավոր կյանք և գործունեություն:

«Էջմիածին» ամսագրի
ընթերցող՝ Մ. Ն.

12 հուլիսի 1956 թ.

Աստուխան

